



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

Tribunál Distritál Dili

24 Abril 2015

Tribunál konklui prosesu sein rona alegasaun finál hosi ministériu públiku no defeza iha krime kondusan sein karta

Iha 21 Abril 2015, Tribunál Distritál Dili hala'o prosesu julgamentu sumáriu ba kazu krime kondusaun sein karta ne'ebé involve arguidu GMC. Kazu ne'e akontese iha 18 Abril 2015, iha área Tasi-Tolu, Distritu Dili.

Iha prosesu ne'e, depois rona tiha deklarasaun hosi arguidu, tribunál kontinua kedas ho leitura sentensa sein rona alegasaun finál hosi parte ministériu públiku no defeza.

“JSMP fiar katak juis sira dalaruma iha sira-nia konsiderasaun rasik ba kazu ida-idak, maibé kualker kazu hot-hotu ne'ebé lori ba tribunál tenke prosesu tuir lei no regra prosesus aplikavel sira ne'ebé eziste atu aseguira ema nia direitu arguidu nian kona-ba julgamentu justu,” dehan Diretór Ezekutivu JSMP, Luis de Oliveira Sampaio.

JSMP kestiona julgamentu ba kazu ne'e tanba juis la fo tempu ba ministériu públiku no defeza hodi hato'o sira nia alegasaun finál. JSMP hanoin katak tuir loloos ministériu públiku no defeza tenke husu ba tribunál hodi hato'o sira nia alegasaun finál antes tama ba leitura sentensa. Normalmente juis sira halo desizaun ba kazu ruma bazeia ba alegasaun finál hosi ministériu públiku no defeza hanesan baze ba sentensa juis nian. Juis baibain sei tetu sirkunstánsia agravante jerál no atenuante jerál sira ne'ebé produz durante julgamentu bazeia ba pedidu alegasaun finál-oral hosi ministériu públiku no defeza.

Tuir artigu 276 (1) Kódigu Prosesu Penál define katak: *depoisde produsaun ba prova hotu tiha, tribunál fo oportunidade, primeiru ba ministériu públiku no, tuir fali, ba defensor, atu ida-idak hato'o oralmente nia konkluzau kona-ba faktus no kona-ba direitu, durante tempu la naruk liu minute tolunulu, salvu kuandu juis hanaruk tan tanba kompleksidade pratikular hosi kazu ida-idak.*

Rua setubal, Colmera, Dili Timor Leste

PoBox: 275

Telefone: 3323883

www.jsmp.tl

info@jsmp.minihub.org

Facebook: www.facebook.com/timorleste.jsmp

Twitter: @JSMPtl

JSMP hanoin katak prosesu ne'e hakat-liu tiha norma prosesuál kona-ba alegasaun finál ne'ebé defini iha artigu 276 (1) Kódigu Prosesu Penál. JSMP espera katak tribunál tenke asegura prosesu hot-hotu la'ó tuir prosedimentu legal aplikavel atu ema hotu ne'ebé involve iha prosesu justisa formal senti katak prosesu ne'e la'ó ho justu no kredível.

Iha kazu ne'e, tribunál kondena arguidu ho pena multa US\$80,00. Tribunál mós aplika pena alternativa durante fulan 2 iha prizaun kuandu arguidu la kumpri pena multa refere. Aleinde ne'e tribunál aplika pena asesória atu arguidu la bele kondus motor durante fulan 3 nia laran.

Julgamentu prezide hosi Dr. Antonino Helder do Carmo, ministeriu publiku reprezenta hosi Dr. Napoleão Soares da Silva no Dr. Ricardo Lito Pereira (estajiáriu) no arguidu hetan defeza hosi Dra. Agustina de Oliveira (estajiária). Kazu ne'e rejista ho Nú. Prosesu : 0068/Sum/2015/TDDIL

Atu hetan informasaun liutan favor kontaktu direktamente:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org